

СЕПТЕМВРИЯ 7-ГО ДЕНЬ.

**ПРЕДПРАЗДНСТВО РОЖДЕСТВА ПРЕСВЯТЫЯ БОГОРОДИЦЫ
И СВЯТАГО МУЧЕНИКА СОЗОНТА**

НА ВЕЧЕРНИ

Стихиры предпразднства, глас 1-й

Подобен: Небесных чинов:

Всемірныя міру / радости возсияша мысленныя лучи, / предвозвещающія
всем Солнце Славы Христа Бога, / в Рождестве Твоем, Пречистая: / Ты бо
Ходатаица показала еси / истиннаго же веселия и благодати.

Предпразднственная сия слава Твоя, / Пречистая, / предвозвещает всем / Твоя
яже паче слова людям благодеяния: / Ты бо ныне веселия Ходатаица, / и будущія
радости нам вина, / Богородице Приснодево.

Боговместимая Отроковица, / и Богородица Чистая, / пророков слава,
Давидова Дщи, / днесь раждается от Иоакима и Анны целомудренныя: / и
Адамова клятва яже / на нас потребляется Рождеством Ея.

Ины стихиры святого, глас 4-й,

Подобен: Дал еси знамение:

Силою укрепляя немощь Твою, блаженне, / нашу немощь волею Понесый, /
мученическое течение Его ради прошел еси, / радуяся, и некрепкаго врага
краснейшими ногами сокрушил еси. / Тем Тебе исплете победныя венцы Иисус /
Человеколюбец и Спас душ наших.

Враги уязвил еси, / уязвену Тебе, славне, / и на землю низвергл еси, / Крестом
вооружився и всеоружии непобедимым обложен яве / и любовьию утверждаемъ тя
к Царством мысленным Пресельшаго, / яко непобедима мученика, / яко небеснаго
человека.

Спасу и Господу, / за тя вольныя подъемшу страсти, / яве подобяся,
страстотерпче Созонте, / самага себе вольно и ранам и язвам и нестерпимым
мукам предал еси. / Темже почествова тя небесными дарованиями, / и источник
исцелений тя любящим показа.

Слава и ныне, глас 4-й, Самогласен

Всечестное Твое Рождество, / Пресвятая Дево Чистая, / Ангелов множество на
небеси и человеческий род на земли ублажаем, / яко Мати была еси всех Творца
Христа Бога: / Того молящи о нас не престай, молимся, / иже на Тя по Бозе
упование положших Богородице / всепетая и Неискусобрачная.

На стиховне стихирьы, глас 8-й

Подобен: О преславнаго чудесе:

О преславнаго чудесе, / яко от нераждающия матере и неплоднаго заматерения, / Жезл цвет носяй, прозябает днесь, / Богомати и Неискусобрачная, / от праведных Иоакима и Анны. / Темже радуется ныне и пророческий собор, / патриархов все торжество в Рождестве Ея.

Стих: Слыши, Дщи, и виждь и приклони ухо Твое.

Днесь Давид радуется, / и Иессей ныне играет, / и Левий величается, / и радуется духом Иоаким праведный, / и безчадство Аннино разрешается / Твоим Рождеством, Марие Пречистая Богородованная, / и ангельский собор с человеки, / вси блажим Божественную утробу Твою.

Стих: Лицу Твоему помолются богатии людстии.

Радуйся, человеческий соборе, / радуйся, Господень храм, / радуйся, Горо святая, / радуйся, Божественная Трапезо, / радуйся, Светильниче Света. / Радуйся, Славо православных, Честная. / Радуйся, Марие, Мати Христа Бога. / Радуйся, Всенепорочная. / Радуйся, Предложение Божественнаго хлеба. / Радуйся, Скиние. Радуйся, Купино Неопалимая. / Радуйся, всех Надеждо.

Слава, и ныне, Глас 4-й. Германово

Всемирная радость / от праведных возсия нам / от Иоакима и Анны всепетая Дева, / Яже премногия ради чистоты, / Храм Божий одушевленный бывает, / и Едина воистинну Богородица познавается. / Тоя молитвами, Христе Боже, / мир миру низпосли и душам нашим велию милость.

Тропарь предпразднства, глас 4:

От корене Иесеева и от чресл Давидовых, / Богоотроковица Мариам раждается днесь нам: / радостию бо радуются всяческая и обновляются. / Срадуйтесь купно, небо и земля, / восхвалите Ю отечествия языков. / Иоаким веселится и Анна торжествует, зовущи: / неплоды раждает Богородицу, и Питательницу жизни наша.

Глас 4, Богородичен:

Еже от века утаенное / и Ангелом несведомое таинство, / Тобою, Богородице, сущим на земли явися Бог, / в неслитном соединении воплощаемь / и, Крест волею нас ради восприим, / имже воскресив первозданного, / спасе от смерти души наша.